

11 JAN 1999

Abdullah-Dasar

KEMENTERIAN LUAR MAKIN DAPAT PERHATIAN RAKYAT

KUALA LUMPUR, 11 Jan (Bernama) -- Timbalan Perdana Menteri Datuk Seri Abdullah Ahmad Badawi hari ini berkata Kementerian Luar kini semakin mendapat perhatian bukan saja golongan intelektual tetapi juga rakyat yang mengikuti perkembangan dasar luar Malaysia.

Bekas Menteri Luar itu berkata isu-isu luar negara kini telah sampai ke peringkat akar umbi dengan orang ramai kini bercakap mengenai perkembangan di Bosnia Herzegovina dan Palestin, umpamanya.

"Rakyat Malaysia juga kini aktif ke luar negara untuk melabur dan berdagang atau tujuan lain. Ini menyebabkan Wisma Putra menjadi fokus rakyat yang ingin tahu kedudukan kita dalam banyak perkara," katanya ketika berucap pada majlis perpisahan anjuran pegawai dan kakitangan Kementerian Luar di sini.

Abdullah, 59, memulakan tugasnya sebagai Timbalan Perdana Menteri hari ini. Pengumuman mengenai pelantikannya dibuat Perdana Menteri Datuk Seri Dr Mahathir Mohamad pada Jumaat lepas.

Abdullah berkata kejayaan Wisma Putra meningkatkan prestasinya juga banyak bergantung kepada peranan aktif yang dimainkan Dr Mahathir sebagai ketua kerajaan terutamanya di peringkat antarabangsa.

Abdullah berkata tugasnya selama lapan tahun sebagai Menteri Luar, yang paling lama berbanding dengan di kementerian-kementerian lain, telah menyumbang kepada kerjaya politiknya sehingga dilantik menjadi Timbalan Perdana Menteri yang baru.

"Kalau dilihat kerjaya saya dalam pentadbiran, mungkin itu ada juga sumbangan kepada kerjaya politik saya," katanya.

Menurutnya tugasnya menerajui Wisma Putra merupakan satu pengalaman yang baik untuknya kerana di situlah beliau menimba pengajaran berharga berhubung soal diplomasi dan cara mengendalikan hubungan luar.

"Walaupun Wisma Putra diperhatikan dengan dekat oleh kerajaan dan rakyat, ia berjaya menangani segala isu luar negara dengan baik sehingga mendapat pengiktirafan mereka," katanya.

Sambil berjanji untuk terus memberikan sokongan kepada Wisma Putra, beliau meminta seluruh warga Wisma Putra memberikan kerjasama yang baik kepada Menteri Luar yang baru, Datuk Seri Syed Hamid Albar.

-- BERNAMA

MAM NMO